



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

SOROTAN STATISTIK EKONOMI MALAYSIA, SIRI 7/2025

Ekonomi Malaysia berkembang 4.5 peratus pada suku tahun kedua 2025, disokong oleh kestabilan prestasi sektor dan pasaran buruh yang berdaya tahan

PUTRAJAYA, 31 JULAI 2025 – Pada hari ini, Jabatan Perangkaan Malaysia (DOSM) mengeluarkan **Sorotan Statistik Ekonomi Malaysia (MESR), Siri 7/2025**. Edisi ini memberi tumpuan kepada statistik terkini yang dikeluarkan pada Mei 2025 dan beberapa statistik akan datang untuk Jun 2025. Selain itu, edisi ini turut memuatkan artikel tambahan bertajuk " Adakah Peningkatan Import Kenderaan Elektrik (EV) di Malaysia Mempengaruhi Nilainya Untuk Jangka Panjang dan Pendaftaran Kereta Tempatan?", yang mana meneliti implikasi peningkatan import kenderaan elektrik (EV), kelestarian penggunaan EV serta hubungannya dengan harga kenderaan dan pendaftaran kenderaan tempatan.

Prospek pertumbuhan global bagi tahun 2025 telah disemak semula, dengan laporan *World Economic Situation and Prospects* (WESP) menjangkakan pertumbuhan 2.4 peratus, berbanding 2.9 peratus pada tahun 2024, susulan pelarasan sebanyak 0.4 mata peratusan sejak Januari. Ketegangan perdagangan yang semakin memuncak, disebabkan oleh tindak balas antara negara, telah mengubah rantai bekalan, meningkatkan kos dan mewujudkan ketidakpastian, sekali gus memberi tekanan kepada ekonomi dunia. Aliran ini menunjukkan keperluan kepada daya tahan dan kebolehsuaian dalam mendepani landskap ekonomi yang semakin kompleks.

Memfokuskan kepada trajektori ekonomi Malaysia, Ketua Perangkawan Malaysia, Dato' Sri Dr. Mohd Uzir Mahidin menyatakan, "Anggaran awalan Malaysia menunjukkan ekonomi berkembang 4.5 peratus pada suku tahun kedua 2025, meningkat sedikit daripada 4.4 peratus pada suku tahun sebelumnya. Pertumbuhan ini disokong oleh prestasi yang stabil dalam sektor Perkhidmatan dan Pembuatan, di samping peningkatan ketara dalam sektor Pembinaan dan Pertanian. Namun begitu,

sektor Perlombongan & pengkuarian kekal dalam aliran menurun. Secara suku tahunan, ekonomi pulih dengan pertumbuhan 1.0 peratus selepas penguncupan 3.5 peratus pada suku tahun pertama, menjadikan pertumbuhan separuh tahun pertama 2025 sebanyak 4.4 peratus. Angka ini mengukuhkan lagi daya tahan Malaysia dan pertumbuhannya yang berterusan ke arah pengembangan ekonomi yang mampan.”

Mengekalkan prestasinya yang stabil, sektor Pembuatan mencatatkan nilai jualan RM158.7 bilion pada Mei 2025, menunjukkan peningkatan 2.4 peratus tahun ke tahun, didorong oleh pertumbuhan kukuh dalam subsektor Makanan, minuman & tembakau (13.0%), selain sumbangan signifikan daripada Produk elektrik & elektronik (5.0%) serta Produk mineral bukan logam, logam asas dan produk logam yang direka (3.7%). Namun begitu, secara bulanan, nilai jualan menurun 1.1 peratus daripada RM160.4 bilion pada April. Seiring dengan aliran ini, Indeks Pengeluaran Perindustrian (IPP) Malaysia mencatatkan pertumbuhan marginal 0.3 peratus tahun ke tahun, dipengaruhi oleh aktiviti Pembuatan yang perlahan, manakala sektor Elektrik meningkat sedikit 0.4 peratus. Walau bagaimanapun, sektor Perlombongan terus mencatatkan penguncupan ketara 10.2 peratus. Dari sudut yang lebih positif, IPP meningkat 1.1 peratus bulan ke bulan, pulih daripada penurunan 8.0 peratus pada April, sekali gus memberi isyarat awal pemulihan dalam output perindustrian.

Melihat secara lebih menyeluruh kepada sektor Perkhidmatan Malaysia, segmen Perdagangan borong & runcit mencatatkan jumlah jualan RM154.3 bilion pada Mei 2025, menunjukkan pertumbuhan 4.4 peratus berbanding tahun sebelumnya, didorong oleh prestasi kukuh dalam subsektor Perdagangan runcit (4.9%) dan Perdagangan borong (4.7%). Selain itu, subsektor Kenderaan bermotor mencatatkan peningkatan sederhana 1.2 peratus kepada RM19.0 bilion. Secara bulan ke bulan, nilai jualan Perdagangan borong & runcit pulih kepada 1.7 peratus, disokong oleh pertumbuhan dalam semua subsektor, terutamanya subsektor Kenderaan bermotor yang melonjak 7.9 peratus.

Dari perspektif perdagangan luar negeri, jumlah dagangan Malaysia pada Mei 2025 mencatatkan peningkatan 2.6 peratus tahun ke tahun kepada RM252.5 bilion, dengan eksport menyusut 1.2 peratus kepada RM126.6 bilion, manakala import meningkat 6.6 peratus kepada RM125.9 bilion. Secara bulanan, jumlah dagangan, eksport, import dan lebihan dagangan masing-masing menyusut 3.6 peratus, 5.2 peratus, 2.0 peratus dan 85.1 peratus.

Meneruskan momentum perdagangan, prestasi dagangan Malaysia pada Jun 2025 menyusut 1.2 peratus tahun ke tahun. Import kekal dengan peningkatan sederhana, berkembang 1.2 peratus, manakala eksport merosot 3.5 peratus. Sehubungan itu, lebih dagangan mencatatkan RM8.6 bilion, menyusut 40.1 peratus berbanding tempoh yang sama tahun lalu.

Dari sudut harga, dinamik harga di Malaysia pada Mei 2025 terus mencerminkan kestabilan di peringkat pengguna. Inflasi keseluruhan mereda kepada 1.2 peratus, berbanding 1.4 peratus pada April, sekali gus mencatatkan paras terendah dalam tempoh 51 bulan. Peningkatan ini sebahagian besarnya disumbangkan oleh kenaikan sederhana dalam beberapa kumpulan, termasuk Penjagaan diri, perlindungan sosial & pelbagai barangan dan perkhidmatan (3.7%), Pendidikan (2.2%), Makanan & minuman (2.1%), serta Perumahan, air, elektrik, gas & bahan api lain (1.7%), yang kesemuanya mencatat pertumbuhan yang lebih perlahan berbanding bulan sebelumnya. Secara bulanan, inflasi meningkat 0.1 peratus, mengekalkan kadar yang sama seperti pada April. Sementara itu, inflasi pada Jun 2025 meningkat lebih perlahan 1.1 peratus.

Beralih kepada harga pengeluaran, Indeks Harga Pengeluar (IHPR) terus menurun 3.6 peratus tahun ke tahun pada Mei, selepas mencatatkan penurunan 3.4 peratus pada April. Penurunan ini dipengaruhi terutamanya oleh penyusutan berterusan dalam sektor Perlombongan (-15.0%) dan Pembuatan (-3.0%). Sementara itu, sektor Pertanian, perhutanan & perikanan mencatatkan peningkatan 1.8 peratus. Dari segi bulanan, IHPR menurun 1.1 peratus, berbanding penurunan 1.0 peratus pada April 2025. Tambahan, IHPR Malaysia terus menurun 4.2 peratus pada Jun 2025.

Dato' Sri Dr. Mohd Uzir Mahidin turut menekankan bahawa pasaran buruh Malaysia terus mencatatkan peningkatan pada Mei 2025, dengan jumlah guna tenaga meningkat 2.9 peratus tahun ke tahun kepada 16.86 juta orang dan naik 0.3 peratus berbanding bulan sebelumnya. Selaras dengan perkembangan positif ini, kadar pengangguran kekal pada paras 3.0 peratus, menunjukkan penurunan bilangan pengangguran 5.7 peratus secara tahunan dan susut 0.7 peratus secara bulanan. Sementara itu, bilangan tenaga buruh berkembang 2.6 peratus tahun ke tahun kepada 17.38 juta orang, manakala kadar penyertaan tenaga buruh kekal stabil pada 70.8 peratus, meningkat 0.2 mata peratus berbanding Mei 2024 dan tidak berubah berbanding April 2025.

Indexs Pelopor Malaysia menunjukkan unjuran ekonomi yang lebih berhati-hati dengan peningkatan marginal 0.04 peratus tahun ke tahun pada Mei 2025, mencecah 113.7 mata dan meningkat 0.1 peratus berbanding bulan sebelumnya. Meskipun arah

aliran jangka panjang kekal di bawah paras 100.0 mata, prospek jangka pendek Malaysia dijangka kekal sederhana disokong oleh dasar monetari yang lebih longgar, yang berpotensi merangsang permintaan domestik dan menggalakkan pelaburan swasta di tengah-tengah ketidakpastian global yang berterusan.

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 197 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Dikeluarkan oleh:

**PEJABAT KETUA PERANGKAWAN
JABATAN PERANGKAAN MALAYSIA
31 JULAI 2025**

Paparan 1: Indikator Ekonomi Bulanan


Indeks Pelopor

113.7 mata
MEI 2025




Kadar Pengangguran

3.0%
MEI 2025




Pengeluaran Buah Tandan Segar

1.7%
JUN 2025



Pengeluaran Getah Asli

-12.2%
MEI 2025




Indeks Pengeluaran Perindustrian (IPP)

0.3%
MEI 2025



Nilai Jualan Sektor Pembuatan

2.4%
MEI 2025




Nota:

- 1) Kadar pengangguran adalah perkadaran bilangan penganggur kepada jumlah tenaga buruh, dalam peratus.
- 2) Indikator selebihnya dinyatakan dalam peratus perubahan tahun ke tahun


Nilai Jualan Perdagangan Borong & Runcit

4.4%
MEI 2025




Indeks Volum Perdagangan Borong & Runcit

4.1%
MEI 2025



Eksport

-3.5%
JUN 2025




Import

1.2%
JUN 2025




Indeks Harga Pengguna (IHP)

1.1%
JUN 2025



Indeks Harga Pengeluar (IHPR) Pengeluaran Tempatan

-4.2%
JUN 2025



Nota:

- 1) Kadar pengangguran adalah perkadaran bilangan penganggur kepada jumlah tenaga buruh, dalam peratus.
- 2) Indikator selebihnya dinyatakan dalam peratus perubahan tahun ke tahun